

# **Statut advokatske komore FBiH**

**“Službene novine Federacije BiH”, broj 67/02 i, “Službene novine Federacije BiH”, broj 60/03, “ Službene novine Federacije BiH “ broj 56/04 - izmjene i dopune Statuta AKFBiH,**

## **S T A T U T**

### **Advokatske komore Federacije Bosne i Hercegovine**

#### **I OPŠTE ODREDBE**

##### **Član 1.**

Advokatska komora FBiH je asocijacija advokata koji imaju sjedište advokatskih kancelarija na teritoriji Federacije BiH, koji se obavezno udružuju preko regionalnih advokatskih komora i stiču članstvo u Advokatskoj komori Federacije BiH.  
Advokatski pripravnici se obavezno udružuju u posebnu organizaciju advokatskih pripravnika pri Advokatskoj komori FBiH.

##### **Član 2.**

Advokatska komora FBiH ima svojstvo pravnog lica.  
Sjedište Advokatske komore FBiH je u Sarajevu.

##### **Član 3.**

Advokatsku komoru FBiH predstavlja i zastupa Predsjednik Advokatske komore FBiH, a u njegovom odsustvu to vrši Potpredsjednik Advokatske komore FBiH.

#### Član 4.

(1) Advokatska komora FBiH, u okviru Ustava BiH, Ustava Federacije BiH, Ustava BiH, Zakona o advokaturi FBiH i drugih propisa i svojih opštih akata, štiti prava i interese advokata, bez obzira u kojim oblicima obavljaju advokatsku djelatnost.

(2) Komora prati rad advokature, proučava odnose i pojave u društvu i uticaj društvenih odnosa na položaj i rad advokature, kao samostalne i nezavisne djelatnosti, te obavještava organe društvene zajednice i državne organe o uočenim društvenim pojavama zakonodavne djelatnosti i primjeni Zakona i drugih propisa, a sve u cilju svestrane i potpune zaštite pravnim sistemom garantovanih prava i sloboda, imovinskih i drugih interesa građana i drugih subjekata, te u tom cilju naročito:

- brine se o očuvanju samostalnosti, nezavisnosti i ugleda advokature,
- vrši nadzor u pogledu ispunjavanja obaveza i dužnosti advokata, stručnih saradnika i advokatskih pripravnika utvrđenih Zakonom o advokaturi, Statutom i Kodeksom profesionalne etike,
- organizuje stručno obrazovanje i usavršavanje advokata, stručnih saradnika i advokatskih pripravnika,
- preduzima potrebne mjere radi razvijanja profesionalne etike u radu advokata, stručnih saradnika i advokatskih pripravnika i njihovim međusobnim odnosima.

#### II STICANJE PRAVA NA VRŠENJE ADVOKATSKE DJELATNOSTI

#### Član 5.

(1) Pravo na obavljanje advokatske djelatnosti stiče se donošenjem konačnog rješenja o upisu u imenik advokata Advokatske komore FBiH.

(2) Zahtjev za upis u Imenik advokata podnosi se nadležnoj regionalnoj advokatskoj komori, prema namjeravanom sjedištu advokatske kancelarije podnosioca zahtjeva ili sjedištu advokatskog društva. Regionalna komora kojoj je zahtjev za upis advokata podnesen, dužna je da u roku od 30 dana od dana zaprimljenog zahtjeva, svojim rješenjem, utvrdi postojanje zakonskih uslova za upis u Imenik advokata i istim rješenjem izvrši upis u Imenik advokata Advokatske komore FBiH.

(3) Ukoliko Regionalna advokatska komora odbije zahtjev za upis u Imenik advokata, podnosilac zahtjeva, protiv tog rješenja, može u roku od 15 dana podnijeti žalbu Advokatskoj komori FBiH.

(4) Rješenje o upisu u Imenik advokata iz stava 2. ovog člana, regionalna advokatska komora dostavlja odmah, a najdalje u roku od 8 dana od dana donošenja rješenja o upisu, Advokatskoj komori FBiH koja je dužna da, u roku od 30 dana od dana prijema rješenja i spisa, donese rješenje o utvrđivanju postojanja uslova i o upisu u Imenik advokata.

(5) Ukoliko u postupku verifikacije postojanja uslova za upis u Imenik advokata Advokatska komora FBiH utvrdi da nisu ispunjeni uslovi za upis u imenik advokata, svojim rješenjem poništiti će rješenje regionalne advokatske komore i odbiti zahtjev za upis u Imenik advokata ili, prema potrebi, ukinuti rješenje regionalne advokatske komore o upisu i predmet vratiti regionalnoj komori na ponovni postupak.

(6) Protiv konačnog rješenja Advokatke komore FBiH, kojim se zahtjev za upis u Imenik advokata odbija, može se u roku od 30 dana pokrenuti upravni spor, kod Vrhovnog suda Federacije Bosne i Hercegovine.

#### Član 6.

(1) Imenik advokata vodi se kod Advokatske komore FBiH.

(2) Imenik advokata je javna knjiga i podaci iz istog imaju značaj zvanične evidencije, a izvodi iz te evidencije značaj javnih isprava.

(3) Advokat može otpočeti sa obavljanjem advokatske djelatnosti, nakon dobijanja rješenja o upisu u Imenik advokata i davanja svečane izjave. Svečanu izjavu, advokat je dužan dati najdalje u roku od 8 dana od dana dobijanja rješenja o upisu u Imenik advokata.

(4) Svečana izjava daje se pred predsjednikom Advokatske komore Federacije BiH . Tekst svečane izjave glasi:

“svečano izjavljujem da ću advokatsku djelatnost obavljati savjesno i stručno, da ću se u svom radu pridržavati Ustava BiH, Ustava FBiH, zakona, statuta advokatskih komora i Kodeksa profesionalne etike, te da ću u svom radu štiti ugled advokature i izvršavati sve obaveze prema Advokatskoj komori FBiH”.

(5) Advokatska komora Federacije Bosne i Hercegovine, najkasnije u roku od 30 dana, dostavlja potpisanu svečanu izjavu Regionalnoj advokatskoj komori koja je izvršila upis davaoca svečane izjave u Imenik advokata.

#### Član 7.

(1) Odlučivanje o zahtjevu za upis advokata je u nadležnosti upravnog odbora regionalne advokatske komore, a ocjenu postojanja uslova, po donošenju rješenja o upisu regionalne advokatske komore, u smislu člana 5. ovog Statuta, vrši Komisija za Verifikaciju upisa koju osniva Upravni odbor Advokatske komore FBiH.

(2) Ukoliko je prije donošenja rješenja o upisu u Imenik, odnosno prije verifikacije postojanja uslova za upis od strane Advokatske komore FBiH, protiv podnosioca zahtjeva pokrenut krivični postupak za djelo koje bi podnosioca zahtjeva činilo nedostojnim za obavljanje advokatske djelatnosti, postupak za upis će se prekinuti. O prekidu postupka upisa u Imenik advokata, nadležni organ regionalne advokatske komore donosi pismeni zaključak, protiv kojeg je dopuštena žalba Advokatskoj komori FBiH u roku od 15 dana od dana dobijanja pismenog otpisivanja zaključka. Ukoliko su ispunjeni uslovi, a regionalna komore ne donese zaključak o prekidu postupka, za njegovo donošenje je ovlašten nadležni organ Advokatske komore FBiH. Protiv tog zaključka može se pokrenuti upravni spor, u roku od 30 dana, kod Vrhovnog suda Federacije Bosne i Hercegovine.

#### Član 8.

- (1) Ako je zahtjev za upis u Imenik advokata pravosnažno odbijen zbog nepostojanja uslova za upis, novi zahtjev se može podnijeti odmah po sticanju uslova za upis u Imenik advokata.
- (2) Ako je zahtjev za upis u Imenik advokata pravosnažno odbijen zbog neispunjenja uslova iz tačke 8. člana 18. Zakona o advokaturi FBiH, novi zahtjev se može podnijeti nakon isteka roka od dvije (2) godine od dana pravosnažnosti rješenja kojim je raniji zahtjev bio odbijen.

#### Član 9.

- (1) Ukoliko se utvrdi da je u postupku upisa u Imenik advokata podnosilac dao neistinite podatke ili priložio neistinite isprave, postupak upisa će se obnoviti po službenoj dužnosti, rješenje o upisu u Imenik advokata poništiti i zahtjev za upis odbiti.
- (2) Protiv rješenja regionalne advokatske komore, donesenom u postupku obnove upisa u Imenik advokata, iz prethodnog stava, dopuštena je žalba Advokatskoj komori FBiH, u roku od 15 dana od dana prijema rješenja. Protiv rješenja Advokatske komore FBiH donesenog u postupku obnove upisa, može se u roku od 30 dana pokrenuti upravni spor kod Vrhovnog suda Federacije Bosne i Hercegovine.
- (3) Inicijativu za obnovu postupka upisa, može podnijeti, po saznanju razloga za obnovu, svaki organ regionalnih ili Advokatske komore FBiH.
- III ADVOKATSKI STRUČNI SARADNICI

#### Član 9.a.

Advokatski stručni saradnici zaposleni kod advokata, u zajedničkoj advokatskoj kancelariji ili advokatskom društvu, obavljaju djelatnost pružanja pravne pomoći na način i u granicama određenim zakonom, ovim tatutom i drugim općim aktima Advokatske komore F BiH.

#### Član 9.b.

Svojestvo advokatskog stručnog saradnika stiče se upisom u Imenik advokatskih stručnih saradnika Advokatske komore FBiH, po istom postupku predviđenim za upis advokata u Imenik advokata.

Pravo na upis u Imenik advokatskih stručnih saradnika ima lice koje ispunjava uslove iz člana 18. stav 1. tač. 1. do 3. i 5. Zakona o advokaturi, da je dostojno obavljanja djelatnosti advokatskog stručnog saradnika, da ima zaključen ugovor o radu sa advokatom, zajedničkom advokatskom kancelarijom ili advokatskim društvom, da nije u radnom odnosu kod drugog poslodavca, odnosno ako pismeno izjasni da će mu prestati radni odnos kod drugog poslodavca, najkasnije na dan koji prethodi danu upisa u Imenik advokatskih stručnih saradnika.

Član 9.c.

Advokatski stručni saradnik briše se iz Imenika advokatskih stručnih saradnika:

- prestankom ugovora o radu;
- na zahtjev advokatskog stručnog saradnika;
- zasnivanjem radnog odnosa kod drugog poslodavca;
- izricanjem disciplinske mjere kojom se advokatskom stručnom saradniku zabranjuje obavljanje djelatnosti;
- u slučaju iz člana 46. stav 1. tačka 10. Zakona o advokaturi

Član 9.d.

U Imenik advokatskih stručnih saradnika upisuju se njegovi lični podaci (ime, prezime, jedinstven matični broj građana), ime, prezime i sjedište kancelarije advokata, naziv, imena i prezimena članova i sjedište zajedničke advokatske kancelarije, odnosno firma i sjedište advokatskog društva-poslodavca, datum položenog pravosudnog ispita, podaci o izrečenim disciplinskim mjerama za vrijeme trajanja radnog odnosa u svojstvu advokatskog stručnog saradnika, datum i osnov brisanja iz Imenika.

IV STICANJE SVOJSTVA ADVOKATSKOG PRIPRAVNIKA

Član 10.

Svojstvo advokatskog pripravnika stiče se upisom u Imenik advokatskih pripravnika Advokatske komore FBiH.

Član 11.

(1) Upis u Imenik advokatskih pripravnika vrši se po istom postupku, po kojem se vršii upis u Imenik advokata (član 7. ovog Statuta).

(2) Uz zahtjev za upis u Imenik advokatskih pripravnika, pored dokaza o postojanju opštih uslova za sticanje svojstva advokatskog pripravnika (član 51. Zakona o advokaturi) prilaže se pismena saglasnost advokata - principala kod kojeg će pripravnik obavljati pripravničku praksu.

(3) Nakon donošenju rješenja o upisu u Imenik advokatskih pripravnika, advokatski pripravnik ne može otpočeti sa obavljanjem pripravničke prakse prije nego što, dostavi Advokatskoj komori FBiH ugovor o radu sa advokatom kod kojeg će obavljati pripravničku praksu.

(4) Pripravnička praksa advokatskog pripravnika traje najmanje dvije (2) godine do

polaganja pravosudnog ispita i dvije godine (2) nakon polaganja pravosudnog ispita, a može se iz opravdanih razloga rješenjem regionalne advokatske komore, koja je donijela rješenje o upisu u Imenik advokatskih pripravnika, produžiti najviše za još jednu (1) godinu.

V IMENICI I REGISTRI KOJE VODI ADVOKATSKA KOMORA FBIH

## Član 12.

(1) Advokatska komora FBIH vodi Imenik advokata, Imenik advokatskih stručnih saradnika, Imenik advokatskih pripravnika, Imenik advokatskih stručnih saradnika i Imenik advokatskih društava i evidenciju zajedničkih advokatskih kancelarija.

(2) Imenici iz prethodnog stava su javne knjige, a potvrde i uvjerenja o činjenicama i podacima iz Imenika koje izdaje Advokatska komora FBIH imaju značaj javnih isprava.

## Član 13.

Prilikom osnivanja advokatskog društva kao pravnog lica, prije njegovog upisa u registar privrednih društava nadležnog suda, Upravni odbor Advokatske komore FBIH, svojim rješenjem, utvrđuje da li je ugovor o osnivanju advokatskog društva kaopravnog lica u skladu sa Zakonom o advokaturi, Statutom, Kodeksom profesionalne etike, kao i drugim opštim aktima regionalne i Advokatske komore FBIH.

## Član 14.

(1) Upis u Imenik advokatskih društava Advokatske komore FBIH vrši se na osnovu zahtjeva osnivača koje se podnosi u roku od 8 dana, od dana prijema rješenja o upisu u registar privrednih društava nadležnog suda.

(2) Advokatska komora FBIH je dužna izvršiti upis u Imenik advokatskih društava, u roku od 8 dana od dana prijema zahtjeva za upis, te o tome donijeti rješenje i dostaviti ga podnosiocu zahtjeva.

(3) Ukoliko Advokatska komora FBIH ne donese rješenje, u roku iz stava 2 ovoga člana i isto ne dostavi podnosiocu zahtjeva za upis, smatraće se da je upis u Imenik advokatskih društava izvršen.

## Član 15.

(1) U Imenik advokata Advokatske komore FBIH upisuju se lični advokata, datum diplomiranja na pravnom fakultetu, datum polaganja pravosudnog ispita, datum polaganja

advokatskog ispita, broj i datum rješenja o upisu u Imenik advokata, dan davanja svečane izjave advokata, sjedište advokatske kancelarije advokata, dan i osnov brisanja iz Imenika advokata, podaci o likvidatoru kancelarije, podaci o vršenju funkcija u izbornim organima komore, te podaci o izricanju disciplinskih mjera, privremenoj zabrani obavljanja advokatske djelatnosti i drugi bitni podaci.

(2) U Imenik advokatskih društava upisuje se broj i datum rješenja Advokatske komore FBiH o prethodnoj saglasnosti za osnivanje advokatskog društva (član 39. st. 1. Zakona o advokaturi FBiH), broj i datum rješenja o upisu društva u registar nadležnog suda, te broj i datum upisa društva u Imenik advokatskih društava Advokatske komore FBiH.

(3) U Imenik advokatskih društava se upisuje i prestanak rada društva, podacio članovima društva, pristupanje osnivačkom ugovoru novih članova, istupaanje iz društva i drugi bitni podaci.

## Član 16.

U Imenik advokatskih pripravnika Advokatske komore FBiH, upisuju se lični podaci pripravnika, ime i prezime advokata - principala, advokatskih stručnih saradnika, početak i završetak pripravničke prakse, podaci o produženju pripravničke prakse, datum položenog pravosudnog ispita, podaci o disciplinskim mjerama za vrijeme pripravničke prakse, podaci o vršenju funkcija u organizaciji advokatskih pripravnika Advokatske komore FBiH, i drugi podaci od značaja za vršenje pripravničke prakse.

## VI PRAVA I DUŽNOSTI ADVOKATA I ADVOKATSKIH PRIPRAVNIKA

### A. A d v o k a t i

## Član 17.

(1) U skladu sa Zakonom, Statutom, kao i drugim opštim aktima Advokatske komore FBiH i regionalnih advokatskih komora, advokat ima pravo da učestvuje u radu organa komora, uključujući i pravo da bira organe komore i bude u njih biran.

(2) Dužnost je advokata da savjesno i odgovorno vrši funkcije u organima i tijelima advokatske komore, u koje je biran ili imenovan. Nesavjesno, nemarno ili neodgovorno obavljanje dužnosti na funkcijama na koje je izabran ili imenovan u organima komore, predstavlja težu povredu advokatske dužnosti.

## Član 18.

Na zahtjev organa Advokatske komore FBiH i regionalnih komora, advokat je dužan davati tražene podatke i obavještenja koja se odnose na obavljanje advokatskih poslova, izuzev podataka koji po Kodeksu profesionalne etike predstavljaju advokatsku tajnu.

#### Član 19.

(1) U slučajevima kada je za vrijeme bolesti ili drugih opravdanih razloga, spriječen da obavlja advokatsku djelatnost, advokat je dužan odrediti zamjenika iz redova advokata.

(2) O uslovima vršenja zamjenjivanja, u smislu prethodnog stava, zaključuje se pismeni sporazum, između advokata koji zamjenjuje i advokata kod kojeg je nastao razlog spriječenosti za vršenje advokatske djelatnosti. Ovaj sporazum se dostavlja nadležnom organu regionalne advokatske komore.

(3) Ukoliko advokat ne odredi zamjenika za vrijeme privremene spriječenosti obavljanja advokatske djelatnosti, nadležni organ regionalne advokatske komore dužan je, odmah po saznanju za razlog spriječenosti, odrediti zamjenika iz redova advokata sa sjedištem na teritoriji regionalne komore i utvrditi uslove pod kojima će se vršiti zamjenjivanje, te o tome izvijestiti Advokatsku komor FBiH.

#### Član 20.

(1) Advokat, zajednička advokatska kancelarija ili advokatsko društvo su ovlašteni informisati javnost o obavljanju advokatske djelatnosti. Ovakvo informisanje se može vršiti isključivo pod uslovima definisanim ovim statutom i Kodeksom advokatske etike.

(2) Advokat, zajednička advokatska kancelarija ili advokatsko društvo mogu javno objavljivati sljedeće podatke:

- imena i prezimena advokata
- njihovu stručnu spremu
- dan upisa u imenik advokata, odnosno u imenik advokatskih društava
- uža pravna oblast kojom se bavi
- poznavanje stranih jezika

(3) Navedeni podaci se mogu objavljivati:

- na tabli istaknutoj na zgradi gdje nalazi sjedište kancelarije,
- na memorandumu
- u profesionalnim listinzima advokata,
- na vlastitoj WEB stranici.

(4) Advokat, zajednička advokatska kancelarija ili advokatsko društvo ne mogu reklamirati svoje aktivnosti i koristiti sredstva za privlačenje klijenata koja nisu u skladu sa ovim statutom. Posebno nije dozvoljeno:

- korištenje treće strane ili bilo kakvog posrednika u privlačenju novih klijenata,
- reklamiranje u sredstvima javnog informisanja,
- plakatiranje ili slanje cirkularnih pisama,
- bilo kakvo drugo oglašavanje koje bi bilo učinjeno na način neprimjeren advokatskoj profesiji, neprihvatljivim sredstvima ili sa nedozvoljenim ili neistinitim sadržajem.

(5) Neće se smatrati nedozvoljenim reklamiranjem:

- dostavljanjem detaljnijih podataka o advokatu i njegovom profesionalnom iskustvu koje se vrši na zahtjev klijenta (npr. Curriculum vitae, referentne liste klijeneta i sl.)

- slanje uobičajenih individualnih čestitki povodom državnih, vjerskih i drugih praznika koje se upućuju advokatima ili svojim klijentima.

(6) Svaka djelatnost koja ima karakter nedozvoljenog reklamiranja smatraće se težom povredom advokatske dužnosti.

(7) Upravni odbor Advokatske Komore Federacije BiH je ovlašten da, kako na općenit način, tako i u individualnim slučajevima, daje zvanična tumačenja da li određeno ponašanje predstavlja neovlašteno obavljanje djelatnosti, te po potrebi da donese opšti akt kojim bi se ova materija pobliže regulisala.

Advokat, zajednička advokatska kancelarija ili advokatsko društvo su obavezni da Advokatskoj komori dostave podatke o broju i punom sadržaju WEB stranice, odmah nakon što ona bude objavljena.

- - - - - (3) - - - - - (5) -  
- (6) (7)

## Član 21.

(1) Advokat odgovara za štetu koju prouzrokuje stranci koju zastupa, a koja je prouzrokovana namjerno ili očigledno nesavjesnim i nestručnim zastupanjem klijenta.

(2) Advokat, kao i zajedničke advokatske kancelarije i advokatska društva, dužni su zaključiti sa ovlaštenim društvima za osiguranje, ugovore o osiguranju od odgovornosti za štete pričinjene u vršenju advokatske djelatnosti do visine osigurane sume koju će u roku od 60 dana od dana usvajanja ovog Statuta, posebnim pravilnikom utvrditi Upravni odbor Advokatske komore FBiH, za svaki oblik vršenja advokatske djelatnosti.

(3) U skladu sa odredbama stavova 1. ovog člana, svi advokati koji obavljaju djelatnost u advokatskom društvu u svojstvu njegovog osnivača, solidarno odgovaraju za štetu nanесenu u vršenju advokatske djelatnosti djelovanjem ili propuštanjem bilo kojeg advokata u društvu. Advokati koji su zaposleni u društvu, a nisu njegovi osnivači, odgovorni su samo za štete koje su nastale kao posljedica njihovog vlastitog djelovanja ili propuštanja

## Član 22.

(1) Advokat je dužan odbiti da prihvati zastupanje klijenta iz razloga navedenih u odredbi člana 22. st. 2. Zakona o advokaturi, kao i u drugim slučajevima, predviđenim Kodeksom profesionalne etike.

(2) Postupanje protivno prethodnom stavu ovog člana, predstavlja težu povredu advokatske dužnosti.

(1) (2) (3)

## Član 23.

Kada advokatu koji obavlja djelatnost u advokatskom društvu prestane članstvo ili radni odnos u tom društvu, on može nastaviti sa radom u individualnoj advokatskoj kancelariji ili zajedničkoj advokatskoj kancelariji, bez ponovnog upisa u Imenik advokata. O sjedištu kancelarije i obliku obavljanja advokatske djelatnosti, raniji član advokatskog društva, dužan je pismenim podneskom obavijestiti regionalnu advokatsku komoru, nadležnu po sjedištu kancelarije u kojoj advokat namjerava nastaviti advokatsku djelatnost. Član 24.

(1) Advokat, zajednička advokatska kancelarija, kao i advokatsko društvo, mogu imati sjedište kancelarije odnosno društva, samo u jednom mjestu.

(2) Nedopušteno je van sjedišta advokatske kancelarije, otvaranje podružnica ili predstavništava, kao i stavljanje obilježja kancelarije, na prostore izvan sjedišta advokatske kancelarije. Advokatska društva mogu osnivati podružnice izvan svog sjedišta u skladu sa odredbama Zakona o privrednim društvima, pod uslovom da u podružnici stalno mora obavljati djelatnost najmanje jedan advokat.

(3) Postupanje protivno prethodnom stavu ovog člana predstavlja težu povredu dužnosti i prava advokata.

## Član 25.

(1) Pismenim ugovorom članova advokatskog društva, kao i ugovorom o pristupanju advokatskom društvu, moraju se regulisati prava i obaveze članova društva, prava i obaveze člana društva u slučaju prestanka članstva u društvu, kao i prava nasljednika člana društva u slučaju njegove smrti.

(2) Aktom iz stava 1. ovog člana nedopušteno je bilo kojeg advokata u društva staviti u položaj koji bi ugrožavao njegovu nezavisnost u vršenju advokatske djelatnosti u smislu odredbe člana 6. Zakona o advokaturi FBiH. Ocjenu o tome daje Upravni odbor Advokatske komore FBiH, koji po izvršenoj ocjeni svojim rješenjem, može staviti van snage određene odredbe ugovora, osnivačkog akta ili drugog opšteg akta advokatskog društva.

## Član 26.

(1) U zajedničkim advokatskim kancelarijama, kao i u advokatskim društvima disciplinska i druga odgovornost advokata je individualna.

(2) Materijalna odgovornost za štetu nanесenu klijentu, u vršenju advokatske djelatnosti je individualna za advokate u zajedničkoj advokatskoj kancelariji. U advokatskim društvima ova odgovornost je solidarna je za sve advokate članove, dok je odgovornost advokata koji obavljaju djelatnost u advokatskim društvima po osnovu ugovora o radu ili ugovora o djelu individualna. .

B. Advokatski stručni saradnici

### Član 26.a.

Advokatski stručni saradnik, po nalogu i uputstvima advokata odnosno ovlaštenog lica u advokatskom društvu, vrši prethodnu obradu predmeta koji su povjereni advokatu, odnosno advokatskom društvu a naročito:

- vrši uvid u spise predmeta u sudovima, drugim državnim organima, organizacijama koje vrše javna ovlaštenja, privrednim društvima i drugim pravnim licima;
- vrši uvid u javne registre i pribavlja izvode iz tih registara;
- priprema nacрте podnesaka u svim postupcima u kojima advokat ima položaj zastupnika, punomoćnika odnosno branitelja;
- priprema nacрте ugovora i drugih privatnih isprava o pravnim poslovima;
- obavlja i druge poslove koje odredi advokat ili ovlašteno lice u advokatskom društvu, a čije obavljanje nije u suprotnosti sa položajem i ovlaštenjima advokatskog stručnog saradnika.

- - - - -

#### Član 26.b.

Advokatski stručni saradnik ne može samostalno, bez prethodnog odobrenja advokata odnosno ovlaštenog lica u advokatskom društvu, samostalno zastupati ili pregovarati sa klijentima o uslovima zastupanja ili obavljanja drugih poslova pravne pomoći, ugovarati i primati naknade troškova i nagrade za rad advokata, primati novac, vrijednosne papire i druge pokretne stvari koje se imaju isporučiti trećim licima.

#### Član 26.c.

Ugovorom o radu, u skladu sa zakonom, Statutom i drugim općim aktima Advokatske komore Federacije BiH, ugovorom o osnivanju zajedničke advokatske kancelarije odnosno statutom ili drugim općim aktom advokatskog društva, bliže se uređuju poslovi koje obavlja advokatski stručni saradnik, njegova prava, obaveze i odgovornosti.

#### Član 26.d.

Advokatski stručni saradnik koji na radu ili u vezi sa radom namjerno ili iz krajnje nepažnje prouzrokuje štetu poslodavcu (advokat, zajednička advokatska kancelarija, advokatsko društvo), dužan je štetu naknaditi.

#### Član 26.e.

Advokatski stručni saradnik koji na radu ili u vezi sa radom namjerno ili iz krajnje nepažnje prouzrokuje štetu trećem licu, a štetu je naknadio poslodavac (advokat, zajednička advokatska kancelarija, advokatsko društvo), dužan je poslodavcu naknaditi iznos naknade isplaćene trećem licu.

#### Član 26. f.

Advokatski stručni saradnici mogu se udružiti u Organizaciju advokatskih stručnih saradnika u okviru Advokatske komore Federacije BiH.

Organizacija advokatskih stručnih saradnika može učestvovati u radu organa Advokatske komore Federacije BiH kao i regionalnim komorama sa pravima i obavezama određenim zakonom, ovim statutom i drugim općim aktima Advokatske komore Federacije BiH odnosno regionalnih komora.

#### Član 26.g.

Odredbе Zakona o advokaturi i ovog Statuta o proceduri upisa u Imenik advokata, pravima i dužnostima advokata, čuvanju advokatske tajne, disciplinskoj odgovornosti i disciplinskom postupku, o privremenoj zabrani odnosno prestaku prava na vršenje advokatske djelatnosti, shodno se primjenjuje i naadvokatske stručne saradnike.

C. Advokatski pripravnici

#### Član 27.

(1) Svrha pripravničke prakse je stručno osposobljavanje za polaganje pravosudnog i advokatskog ispita praktičnim radom u advokatskim kancelarijama svih oblika, a u cilju sticanja uslova za samostalno obavljanje advokatske djelatnosti.

(2) Obavljanje pripravničke prakse nije dopušteno kod advokata koji nema najmanje pet (5) godina staža u obavljanju advokatske djelatnosti, kao ni u zajedničkoj advokatskoj kancelariji i advokatskom društvu, u kojem najmanje jedan (1) advokat ne obavlja advokatsku djelatnost najmanje pet (5) godina.

#### Član 28.

(1) Svojstvo advokatskog pripravnika stiče se upisom u Imenik advokata Advokatske komore FBiH, po istom postupku koji je Zakonom i ovim Statutom predviđen za upis u Imenik advokata.

(2) Pored ispunjavanja opštih uslova za upis u Imenik advokatskih pripravnika predviđenih odredbom člana 51. Zakona o advokaturi, po službenoj dužnosti, nadležni organ Advokatske komore FBiH, prije upisa u Imenik, na osnovu svojih službenih evidencija iz Imenika advokata, vrši provjeru da li advokat kod kojeg pripravnik namjerava obavljati pripravničku praksu, prema podnesenom zahtjevu za upis, ispunjava uslove iz člana 27. ovog Statuta.

#### Član 29.

(1) U rješenju o upisu pripravnika u Imenik advokatskih pripravnika, kao uslov za početak obavljanja pripravničke prakse odrediće se obaveza za podnosioca zahtjeva i njegovog principala da u roku od 8 dana dostave Advokatskoj komori FBiH ugovor o radu između principala i podnosioca zahtjeva zaključen u skladu sa članom 52. stav 1. Zakona o advokaturi FBiH.

(2) Ukoliko bezuspješno protekne rok iz prethodnog stava ovog člana, nadležni organ Advokatske komore FBiH staviće van snage rješenje o upisu u Imenik pripravnika.

#### Član 30.

Tokom vršenja pripravničke prakse, advokatski pripravnik je dužan kontinuirano individualnim radom sticati praktična znanja iz opšte pravne i advokatske struke, te je u tom cilju dužan da učestvuje i u drugim oblicima stručnog osposobljavanja organiziranim u regionalnim i Advokatskoj komori FBiH.

#### Član 31.

(1) Za vrijeme obavljanja pripravničke prakse, advokatski pripravnik je dužan postupati po uputama i smjericama principala i koristiti stručne savjete drugih advokata, u saglasnosti sa principalom.

(2) Advokatski pripravnik ne može, bez odobrenja principala, neposredno primiti klijenta za zastupanje, niti od klijenta vršiti naplatu naknade za zastupanje i troškova za rad advokata klijenta.

(3) Advokatski pripravnik, po odobrenju principala, može zamijeniti u zastupanju drugog advokata, ali tada ne može ugovarati, zahtijevati ili primiti naknadu za zastupanje za zamjenu od advokata kojeg zamjenjuje.

#### Član 32.

Sve odredbe Zakona o advokaturi ovog Statuta, Kodeksa profesionalne etike i drugih opštih akata advokatskih komora, u pogledu čuvanja advokatske tajne, zabrane zastupanja, prava odbijanja prijema klijenta na zastupanje, shodno se primjenjuju i na advokatske pripravnike.

#### Član 33.

(1) Advokatski pripravnici, sa područja Advokatske komore FBiH, obavezno se udružuju u Organizaciju advokatskih pripravnika Advokatske komore FBiH.

(2) Organizacija advokatskih pripravnika Advokatske komore FBiH bira ili imenuje svoje predstavnike u organe regionalnih i Advokatske komore FBiH, koji u tim organima ravnopravno odlučuju o pitanjima položaja, pravima i obavezama, stručnom osposobljavanju advokatskih pripravnika i drugim pitanjima od značaja za advokatske pripravnike.

#### Član 34.

(1) Svojestvo advokatskog pripravnika prestaje nastupanjem okolnosti predviđenih u odredbi člana 53. Zakona o advokaturi.

(2) Poslije upisa u Imenik advokatskih pripravnika, pripravnik može izvršiti promjenu advokatske kancelarije kod koje će nastaviti pripravničku praksu, uz prethodni raskid Ugovora o radu (radnom odnosu), sa advokatom kod kojeg obavlja praksu i zaključenja Ugovora o radu sa advokatom - principalom, kod kojeg nastavlja pripravničku praksu.

(3) Nastale promjene u smislu prethodnog stava, evidentiraju se nakon provjere u Imenik advokatskih pripravnika Advokatske komore FBiH.

#### VII PRIVREMENA ZABRANA I PRESTANAK VRŠENJA ADVOKATSKE DJELATNOSTI

#### Član 35.

(1) Prestanak prava na obavljanje advokatske djelatnosti, nastupa nastankom okolnosti predviđenih odredbom člana 46. Zakona o advokaturi FBiH.

(2) Rješenje o prestanku prava obavljanja advokatske djelatnosti donosi nadležni organ regionalne advokatske komore i u roku od 8 dana od dana njegovog donošenja, dostavlja ga na verifikaciju Upravnom odboru Advokatske komore FBiH.

(3) Ukoliko nadležni organ Advokatske komore FBiH izvrši verifikaciju rješenja regionalne komore o prestanku prava na obavljanje advokatske djelatnosti, taj organ će donijeti rješenje o brisanju iz imenika advokata Advokatske komore FBiH. Protiv tog rješenja može se pokrenuti upravni spor kod Vrhovnog suda Federacije Bosne i Hercegovine, u roku od 30 dana od dana uručenja rješenja o brisanju, a iz razloga predviđenih u Zakonu o upravnim sporovima Federacije BiH.

(4) Rješenje o brisanju iz Imenika advokata, zbog prestanka prava na obavljanje advokatske djelatnosti, ima pravno dejstvo na čitavoj teritoriji Federacije BiH.

(5) U postupku verifikacije rješenja regionalne komore o prestanku prava na obavljanje advokatske djelatnosti, nadležni organ Advokatske komore FBIH, nakon ocjene uslova i razloga iz rješenja regionalne komore, može rješenje regionalne advokatske komore ukinuti i vratiti na ponovni postupak regionalnoj advokatskoj komori, ili ga preinačiti u slučaju kada utvrdi da ne postoje zakonski razlozi za prestanak prava na obavljanje advokatske djelatnosti.

#### Član 36.

(1) Advokatu će se privremeno zabraniti vršenje advokatske djelatnosti, ako su nastupile okolnosti, predviđene odredbom člana 47 stav 1. Zakona o advokaturi Federacije BiH.

(2) Advokatu se može privremeno zabraniti vršenje advokatske djelatnosti iz razloga predviđenih u odredbi stava 2 člana 47. Zakona o advokaturi FBIH.

(3) Rješenje o privremenoj zabrani obavljanja advokatske djelatnosti, iz stava 1 i 2 ovog člana, donosi nadležni organ regionalne advokatske komore i najdalje u roku od 8 dana od dana njegovog donošenja, dostavlja ga Advokatskoj komori FBIH na verifikaciju.

(4) Ukoliko regionalna advokatska komora i pored postojanja svih uslova ne donese rješenje o zabrani vršenja advokatske djelatnosti, Advokatska komora FBIH je ovlaštena da neposredno donese rješenje o prestanku prava za obavljanje advokatske djelatnosti i brisanju iz Imenika advokata.

(5) Rješenje iz prethodnih stavova ovog člana je konačno i protiv njegaog se može pokrenuti upravni spor kod Vrhovnog suda Federacije BiH, u roku od 30 dana od prijema pismenog opravka rješenja.

(6) Rješenje o privremenoj zabrani vršenja advokatske djelatnosti donosi nadležni organ regionalne advokatske komore. Protiv tog rješenja dopuštena je žalba Advokatskoj komori FBIH, u roku od 15 dana od dana uručenja rješenja. Protiv konačne odluke Advokatske komore FBIH, može se pokrenuti upravni spor kod Vrhovnog suda FBIH, u roku od 30 dana od dana njenog uručenja.

#### Član 37.

(1) U rješenju o privremenoj zabrani obavljanja advokatske djelatnosti mora se označiti, zavisno od razloga donošenja takvog rješenja, tačno ili odredivo vrijeme trajanja zabrane.

(2) U rješenju o privremenoj zabrani obavljanja djelatnosti mora se odrediti privremeni vodilac poslova advokata, na kojeg se odnosi rješenje o zabrani.

(3) Konačno rješenje o privremenoj zabrani, dostavlja se nadležnom ministarstvu pravde kantona prema sjedištu regionalne komore i Ministarstvu pravde Federacije BiH.

#### Član 38.

Sve odredbe ovog Statuta o prestanku prava na obavljanje advokatske djelatnosti, privremenoj zabrani vršenja advokatske djelatnosti, kao i proceduralne odredbe o donošenju tih mjera, analogno se primjenjuju i na advokatske pripravnike.

#### VIII ORGANI ADVOKATSKE KOMORE FBIH

#### Član 39.

Organi Advokatske komore FBIH su:

1. Skupština
  2. Upravni odbor
  3. Predsjednik i Potpredsjednik
  4. Nadzorni odbor
  5. Disciplinski sud i disciplinski tužilac
  6. Komisija za advokatske ispite
  7. Drugi organi, utvrđeni ovim Statutom.
1. Skupština Advokatske komore FBIH